

Qalam

Bilangan 38-September 1953-Zulhijjah-60 Sen

IKATAN UMNO-M.C.A

Banyak orang-orang kita Melayu sekarang tertanya-tanya apakah sebenarnya tujuan perikatan di antara UMNO-M.C.A. yang ada sekarang. Adakah ia bakal menguntungkan kepada maslahat orang-orang Melayu atau adakah ia bermakna memberikan hak-hak orang-orang Melayu yang selama ini diidamkan oleh anak-anak dagang kepada mereka itu; atau adakah yang demikian itu kerana menuntut suatu cita-cita yang besar yang ada kepada kita mesti diberi dijadikan pengorbanan untuk menyampaikan cita-cita itu?

Tatkala hendak menuntut kemerdekaan daripada penjajahan British di Semenanjung Tanah Melayu ini, maka perkara yang mustahak dipandang oleh orang-orang Melayu ialah cara mana kita menuntutnya dan kepada siapa kemerdekaan itu diambil.

Semenjak daripada dahulu lagi kepada perjanjian Federation bahawa rundingan atau perjanjian itu dibuat adalah di antara Raja-raja Melayu (bagi pihak orang-orang Melayu) dengan kerajaan British. Di sana tidak ada satu pun campuran daripada anak-anak dagang. Tidak ada tawar menawar yang dilakukan di antara pihak orang-orang Melayu kepada anak-anak dagang itu oleh kerana dari dahulu lagi bahawa orang-orang Melayu itulah yang diiktiraf berhak dalam negeri ini, di dalam negeri yang telah membuat perjanjian atau telah membuat janji dengan orang-orang British – tidak dengan orang-orang lain seperti anak-anak dagang itu.

Kalau sudah begitu kedudukannya maka adalah menjadikan seperkara yang menghairankan di dalam perpaduan UMNO-M.C.A itu kerana orang-orang memandang pada zahirnya bahawa tatkala menuntut kemerdekaan itu dengan sendirinya UMNO nampaknya telah menyerahkan hak-haknya kepada mereka itu dengan memandang sebagai orang yang sama berhak cukup di dalam negeri ini.

Jika pada masa yang lalu perpaduan yang serupa ini diharamkan oleh orang-orang Melayu sehingga timbul perpecahan di dalam UMNO kerana sebahagian besar daripada orang-orang UMNO tidak berkenan memberi hak-hak mereka sama dengan anak-anak dagang itu maka yang demikian ini adalah menjadi suatu langkah yang merbahaya kepada UMNO memberikan hak-hak itu kepada M.C.A. yang diketahui oleh mereka bahawa kedudukannya itu belum diketahui adakah mereka daripada orang-orang yang taat kepada Malaya atau adakah mereka daripada orang-orang Koumintang atau pun daripada pengikut-pengikut Mao Tze Tung.

Tidak payah rasanya membuktikan perkara ini sebab kita masih melihat orang-orang yang berpengaruh besar di dalam pertubuhannya ialah orang-orang yang berpengaruh besar di dalam negeri China yang bersifat masih banyak dagang di sini daripada sebesar-besarnya bersemangat negeri ini.

Kita wajib memberi ingat bahawa pihak-pihak kita orang-orang Melayu wajib memandang di dalam perkara ini atas dua segi: Yang pertama segi perpaduan itu pada tentang segi bekerjasama dengan maslahat lain-lain; dan yang kedua ialah bersama-sama merebut kemerdekaan itu di antara UMNO-M.C.A. Jika langkah yang diambil oleh UMNO pada segi yang pertama maka sudah tentu yang demikian itu tidak mengkhawatirkan sangat iaitu perpaduan itu sekadar untuk bersama-sama mengambil atau menuntut kemerdekaan dengan orang-orang Cina memandang bahawa yang berhak mutlak di dalam perkara ini ialah

orang Melayu – tidak ada anak-anak dagang.

Sekiranya perpaduan itu dituju kepada jalan yang kedua iaitu merebut kemerdekaan itu dengan sama setaraf apalagi dengan meletakkan diri mereka bersama-sama sebagai bangsa Malayanya maka yang demikian itu ialah seperkara yang sangat-sangat merbahaya dan merugikan kepada kita orang-orang Melayu-hak kita akan dibolot oleh orang lainnya. Keadaan inilah yang tidak diperkenan oleh orang-orang Melayu.

Di dalam persidangan UMNO-MCA di Kuala Lumpur pada 23 Ogos yang lalu kita tidak menampak sesuatu pun perkara yang besar dan memberi faedah kepada kita selain daripada adanya semboyan mengakui kedaulatan Raja-raja Melayu. Tidak ada di dalam rancangan itu selain daripada perkara menuntut diadakan pilihan raya pada tahun 1954.

Adanya semboyan mengakui kedaulatan itu seolah-olah sebagai suatu penarik kepada orang-orang Melayu tetapi hakikatnya bahawa perkara itu tidak dapat dilakukan oleh mereka (M.C.A.) daripada mempersetujuinya-sedang di dalam pilihan-pilihan raya yang dikehendaki sebegitu segeranya itu payah orang hendak memikirkannya kerana keadaan dan kedudukan orang-orang kita belum cukup faham akan apa ertinya pilihan raya itu.

Kita wajib syak atas kemahuan yang segera ini ada memberi suatu faedah kepada orang-orang Melayu. Kita telah dapat cukup banyak pelajaran di dalam pilihan-pilihan raya yang ada di dalam Singapura ini di dalam mana pemilih-pemilih itu boleh dibeli untuk memilih orang-orang yang sememangnya tidak cukup berkelayakkan dan ada di antaranya yang tidak tahu pun bercakap-tetapi kerana ada kewangan berdiri di belakangnya jawatan itu didapatinya.

Dengan itu tidaklah hairan kalau sekiranya berlaku dengan sekiranya, sebelum orang-orang kita cukup difahamkan,

maka tentulah yang demikian merugikan dan menjadikan sebab nanti anak-anak dagang akan membeli tiap-tiap pemilih itu untuk faedahnya. Inilah yang mustahak diperhati. Selain daripada itu kita mesti memandang adakah tujuan-tujuan itu akan menguntungkan kepada rakyat jelata atau pun yang demikian itu ditujukan semata-mata menjadikan orang-orang Melayu alat untuk faedah seorang berdua daripada orang-orang kita untuk merebut kedudukan sebagaimana juga UMNO dahulu telah dijadikan alat untuk merebut kedudukan diri seseorang.

Kita wajib mengingatkan bahawa sekiranya perpaduan UMNO-M.C.A. itu tidak dicampuri dengan kuat dan orang-orang UMNO tidak mempertahankan hak-haknya dengan menjadikan asas-asasnya untuk Melayu dengan nama bangsa Melayu maka kita percaya sebagaimana kejadian yang telah lalu UMNO akan berpecah lagi dan akan tidak mendapat lagi sokongan daripada orang-orang Melayu dan engannya harus orang Melayu tidak menghormati lagi langkah-langkahnya bahkan harus datang lagi tuduhan-tuduhan sebagaimana dahulu dengan mengatakan bahawa dahulu Melayu terjual kepada penjajahan sekarang akan terjual kepada orang-orang Cina.

Kita masa ini wajib mengatakan hak-hak kita. M. C.A. sekarang mengikut pandangan kita, tidak akan mahu bekerjasama dengan UMNO sekiranya ada tempatnya bergantung kepada kerajaan sudah jauh, kepada pihak Dato' Sir Onn dan Menteri Besar sudah renggang, dan kepada UMNO-lah ia dapat berpegang, dan merapatkan dirinya sebagai rakan.

Jika benar telahan kita ini maka di dalam masa ini wajiblah UMNO berhati-hati berhubung engannya dan menjaga kewajipannya mengawal maslahat dan kedudukan umat Melayu amnya. Adanya.